

28. marts 2019

Inatsisartut aalajangiiffigisassaattut siunnersuut Namminersorlutik Oqartussat ilalissagaat piginneqqaartussaataitaneq pillugu Inatsisip Kalaallit Nunaanni atortuulersinneqarnissaa Kunngip peqqussutaatigut.

(Ilinniartitaanermut, Kultureqarnermut, Ilageeqarnermut Nunanullu Allanut Naalakkersuisoq)

Matumuuna Namminersorlutik Oqartussat danskit Kultureqarnermut Minstereqarfianniit tusarniaassuteqarfigineqarput piginneqqaartussaataitaneq pillugu inatsisip Kalaallit Nunaanni atortuulersinneqarnissaa Kunngip peqqussutaatigut ilaleneqarsinnaanersoq. Tamannalu Siumumiit imaattumik oqaaseqarfigissavarput:

Piginneqqaartussaataitaneq pillugu inatsit Kalaallit Nunaannut kunngip peqqussutaa aqutigalugu 2006-imi atuutilersinneqarsimasup arlalitsigut allannguiffigineqarsimanerata kinguneraa aalajangiiffigisassatut siunnersuutikkut matumuunakkut Inatsisartut ilaliinissaannik peqquneqassasut.

Peqqussummik iluarsartuusseqqinnissami immikkuualuttut tamaasa tikingikkaluarlugit pingaarnertut Peqqusutikkut suliat illersorneqarnissaat aammalu suliat assigisaallu pissarsiareqqinneqarsinnaajunnaarsimasut sanatinneqaaqqissinnaanerannut periarfissat pitsanngorsarniarneqarmata Siumumi iluarisimaaratsigu oqaatigissavarput. Taamatuttaaq innarluutilinnut atugassarititaasut pitsanngorsarniarneqarnerat Siumumiit tigulluarparput.

Kalaallit Nunaanni ilinniarfeqarfiit Danmarkimi illinarfeqarfiit assigalugit tusarnaagassanik isiginnaagassanillu atortussanik atuisinnaanermut periarfissaqartitsilernissaq aamma Siumumiit ilassilluarparput.

Naggataatigullu piginneqqaartussaataitaasunut pisinnaatitaaffinnik annertusaanerit aamma tikingneqartut Siumumiit naleqqussaanertut isigalugit akuersaaratsigik oqaatigissavarputtaq.

Naatsumik oqaatigalugu allannguutit Kalaallit Nunaannut tunngatillugu inatsimmik ullutsinnut naleqqussaanerit, nutarterinerit tulluarsaanerillu pitsaanerusumik sinaakkusiisussaammata Siumumiit Kunngip peqqussutaatigut pitsanngorsaaviginiarnerqartut tamakkiisumik taperserpagut.

Anders Olsen, Siumut